



Broj: 03-1-02-1-1312-3/24

Datum: 29.05.2025. godine

**SAMOSTALNI SINDIKAT DRŽAVNIH SLUŽBENIKA I NAMJEŠTENIKA
U ORGANIMA DRŽAVNE SLUŽBE, SUDSKOJ VLASTI I
JAVNIM USTANOVAMA U FBiH**
Sindikalna organizacija kantonalnih organa državne službe
Unsko - sanskog kantona, Bihać
Ul. Alije Đerđeleza 2
77000 Bihać

PREDMET: Javno objavljivanje registra imovine nosilaca javnih funkcija sa imenima
maloljetne djece, Mišljenje dostavlja se

VEZA: Vaš akti broj: 01-405-24 od 26.12.2024. godine i urgencija broj: 01-472/25 od
28.04. 2025. godine

Agencija za zaštitu ličnih podataka u Bosni i Hercegovini (u daljem tekstu: Agencija) zaprimila je akte iz Veze, kojima se zahtijeva mišljenje u vezi objavljivanja imena djece u okviru „Registra imovine i poklona nosilaca javnih funkcija i rukovodećih državnih službenika u Unsko - sanskom kantonu (u daljem tekstu: Kanton)

U zahtjevu je između ostalog istaknuto „*Iako su prava djece na privatnost zagarantovana mnogobrojnim međunarodnim dokumentima u ovom slučaju su javno dostupna i svi imaju pristup imenu i prezimenu malodobnog djeteta te imovini sa kojom eventualno raspolaže te su time izložena opasnosti.*

Napominjemo da su podaci koji se navode u Registru imovine i poklona nosioca javnih funkcija i rukovodećih državnih službenika u Unsko – sanskom kantonu, ne odnose na činjenice u vezi posla, koji imenovana lica obavljaju u javnim organima, nego na osjetljive podatke koji se mogu zloupotrijebiti u različite svrhe.

Nije sporno da se podaci prikupljaju od nadležne institucije, nego je sporno da su podaci o malodobnoj djeci javno dostupni.

Skrećemo pažnju na član 16. Konvencije Ujedinjenih nacija o zaštiti prava djece(UNCRC) koji je zagarantovano da“nijedno dijete neće biti podvrgnuto proizvoljnom ili nezakonitom uplitanju u njegov privatni život, porodicu, dom ili dopisivanje, niti nezakonitim napadima na njegovu čast ili ugled“.

U vezi sa naprijed navedenim, na osnovu člana 40. stav (2) tačka g) Zakona o zaštiti ličnih podataka (“Službeni glasnik BiH”, broj: 49/06, 76/11 i 89/11), dajemo sljedeće:

MIŠLJENJE

- I. Zakon o zaštiti ličnih podataka (u daljem tekstu: Zakon) je opšti propis koji reguliše obradu zaštitu ličnih podataka, a primjenjuje se na lične podatke koje obrađuju svi javni organi, fizička i pravna lica, osim ako posebnim zakonom nije propisano drugačije.

Prema članu 3. Zakona, pojedini izrazi imaju sljedeća značenja:

*Sarajevo / Сарајево, Dubrovačka broj 6 / Дубровачка број 6
tel/мел +387 33 726-250, факс/факс +387 33 726-251*

„lični podaci znače bilo koju informaciju koja se odnosi na fizičko lice koje je identifikovano ili se može utvrditi identitet lica,

„nosilac podataka je fizičko lice čiji se identitet može ustanoviti ili identifikovati, neposredno ili posredno, naročito na osnovu jedinstvenog matičnog broja te jednog ili više faktora karakterističnih za fizički, fiziološki, mentalni, ekonomski, kulturni ili socijalni identitet tog lica.

„obrada ličnih podataka podrazumijeva bilo koju radnju ili skup radnji koje se vrše nad podacima, bilo da je automatska ili ne, a posebno prikupljanje, unosenje, organizovanje, pohranjivanje, prerađivanje ili izmjenu, uzimanje, konsultovanje, korištenje, otkrivanje prenosom, širenje ili na drugi način omogućavanje pristupa podacima, svrstavanje ili kombinovanje, blokiranje, brisanje ili uništavanje“;

„zbirka ličnih podataka je bilo koji sistemski skup ličnih podataka koji su dostupni prema posebnim kriterijima, bilo da su centralizirani, decentralizirani ili razvrstani na funkcionalnom i geografskom osnovu ili postavljeni u skladu s posebnim kriterijima koji se odnose na lice i koji omogućavaju nesmetan pristup ličnim podacima u dosjeu;“

„kontrolor je svaki javni organ, fizičko ili pravno lice, agencija ili drugi organ koji samostalno ili zajedno s drugim vodi, obrađuje i utvrđuje svrhu i način obrade ličnih podataka na osnovu zakona ili propisa“;

U članu 4. Zakona propisani su osnovni principi obrade ličnih podataka kojih su obavezni da se pridržavaju svi kontrolori, koji glasi:

„Kontrolor je obavezan da:

- a) lične podatke obrađuje na pravičan i zakonit način;*
- b) lične podatke koje prikuplja za posebne, izričite i zakonite svrhe ne obrađuje na bilo koji način koji nije u skladu s tom svrhom;*
- c) lične podatke obrađuje samo u mjeri i obimu koji je neophodan za ispunjenje određene svrhe;*
- d) obrađuje samo autentične i tačne lične podatke, te da ih ažurira kada je to potrebno;*
- e) lične podatke koji su netačni i nepotpuni, s obzirom na svrhu zbog koje su prikupljeni ili se dalje obrađuju, izbriše ili ispravi;*
- f) lične podatke obrađuje samo u vremenskom periodu koji je neophodan za ispunjenje svrhe u koju su podaci prikupljeni;*
- g) lične podatke čuva u formi koja dopušta identificiranje nosioca podataka ne duže nego što je to potrebno za svrhu u koju se podaci prikupljaju ili dalje obrađuju;*
- h) osigura da se lični podaci koji su prikupljeni u različite svrhe ne objedinjuju ili kombinira.“*

II. Shodno naprijed navedenim definicijama Ured za borbu protiv korupcije je kontrolor, koji objavljuje imovinske kartone nosilaca javnih funkcija na svojoj službenoj web stranici.

Kako je u aktu istaknuto, da je sasvim jasno da postoji potreba za prijavljivanjem i provjerom imovine javnih funkcionera od strane nadležnih tijela, nećemo se upuštati u obrazlaganje zakonskih propisa koji se na to odnose već ćemo se zadržati samo na njihovom objavljivanju.

Dakle, neophodno je praviti razliku između vrste ličnih podataka koji nadležni organi prikupljaju u postupku prijave imovine nosilaca javnih funkcija od vrsta podataka koji se objavljuju.

Svakako da malodobna djeca nosilaca javnih funkcija, ukoliko posjeduju ušteđevinu ili drugu vrstu imovine koju su nosioci javnih funkcija dužni prijaviti, trebaju biti obuhvaćena u objavljenim imovinskim kartonima, jer pripadaju porodici nosioca javne funkcije. Naime, u praksi je moguće da obveznici podnošenja imovinskih kartona, stečenu imovinu evidentiraju kao vlasništvo djeteta. Stoga, pravo djeteta da bude zaštićeno od objavljivanja, ne može imati apsolutnu prednost nad pravom borbe protiv korupcije jer se objavljivanje imovinskih kartona vrši u tu svrhu.

Praksa podnošenja imovinskih kartona, koji uključuju supružnike i djecu nosilaca javnih funkcija, je prisutna i u zemljama članicama Evropske unije koje poštuju najveće standarde ljudskih prava. Pri tome, u cilju zaštite ličnih podataka djeteta, nije neophodno objaviti njegovo ime i prezime. Umjesto objave imena i prezimena, svrha se može postići ako se u objavljenom imovinskom kartonu naznači „dijete“ sa navođenjem ušteđevine koju posjeduje u banci i sl.

Isto bi bilo u skladu sa principom iz člana 4. stav (1) tačka c) Zakona, kojim je propisano da kontrolor obavezan da „*lične podatke obrađuje samo u obimu i mjeri koji je neophodan za ispunjenje određene svrhe*“.

S poštovanjem,

Dostavljeno:

- Naslovu,
- a/a.

DIREKTOR

dr Dragoljub Reljić